

Species *Adenio Honghel* DC. sane proxima, pube tamen omnium partium copiosissima ac inflorescentia elongata racemiformi abunde distincta.

***Niebhria aethiopica.* (Capparideae.)**

Frutex erectus, virgato-ramosus, calvescens. Folia tam subovato-elliptica, quam mere oblonga, acuta v. obtusa, mucronata, supra secus nervum medianum puberula, caeterum glaberrima, majora (4—3 pollicaria) supra medium magis quam basi attenuata. Corymbi copiosi in paniculam foliatam amplam raram dispositi, ramis, pedicellis calycibusque dense puberulis. Flores longe pedicellati. Calycis laciniae ellipticae. Petala his dimidio v. triente breviora, suborbicularia, mucronata, breve unguiculata. Stamina copiosa, calyce 2—2½ pl. longiora. Germen ellipsoideum, mox subglobosum, glaberrimum, 6—3-ovulatum. Bacca coriacea, subglobosa (5—4 lin. lg.), obtusissime appiculata, 1—4 sperma, stipite pedicellum aequante v. superante (10—6 lin. lgo).

Hab. in regno *Sennar ad Tumad Kassan*, ubi mense Jan 1838 floridam ac fructiferam legit Dr. Kotschy.

Maërvae oblongifoliae Rich. quodammodo accedens, fructu tamen abunde distincta.